

Premio Meneer Ovito Tromp 2019 a keda otorga na Sra. Guillermina 'Mina' Tromp

ORANJESTAD (AAN): E aña aki pa di 4 biaha, Centro di Bario Noord a celebra nos Dia Nacional dia di Himno y Bandera, cu nos actividad Fiesta Arubiano cu cada biaha ta un exito rotundo. Riba e dia aki nos a entrega tambe Premio meneer Ovito Tromp.

Na 2016 directiva di CBN a dicidi pa introduci un premio pa duna reconocimiento na baluartenan di e distrito di Noord cu pa varios aña na un manera of otro a of ainda ta aporta grandemente na nos dushi distrito. No solamente nos ta reconoce e echo cu ta importante pa duna balor na nan trabou awo cu nan ta na bida, pero tambe nos ta di opinion cu un premio asina por forma incentiva pa e generacion nobo por haya e smaak pa tambe aporta na nan bario. Mas cu claro cu na momento cu a bay duna number na e premio en cuestion directiva den su totalidad unanimamente a dicidi di duna honor na nos presidente meneer Ovito Tromp d.f.m. Ta un echo cu meneer Ovito Tromp tabata un boluntario di curason cu a laga un trayectoria largo di logro, trabou- y esfuersonan cu te dia di awe e distrito di Noord ta gosa di nan. Den corto: un ehempel pa sigui.

E premio ta dirigi pa duna reconocimiento na baluartenan di e bario di Noord cu den pasado of awo ta/a realiza prestacionnan particular pa y den comunidad. E trabounan realiza mester ta di nivel boluntario y por ta riba diferente tereno contal e meta ta dirigi ariba desaroyo general di e bario di Noord y su habitantenan. Na 2016 sr. Chua Faro a ricibi e Premio Meneer Ovito Tromp, na 2017 srs. Julian Eli



Pers (awe d.f.m.) y Isnardo Faro y na 2018 Rosalinda 'Tanta Lily' Luydens. Personanan cu pa añanan largo a y te ainda ta aporta grandemente na nan dushi Distrito di Noord.

E aña aki Premio Meneer Ovito Tromp a keda otorga na sra. Guillermina Jacinta Tromp. Minister di Labor y Asuntonan Social, sr. Glembert Croes a haci entrega di e premio na sra. Mina. Siguiientemente ta sigui un parti chikito di e bida di sra. Guillermina Tromp.

Guillermina Jacinta Tromp a nace dia 28 september 1944 y ta wordo cariñosamente yama Mina, Mientje of Germina. E ta yiu di Guillermo Jacinto Tromp y Cleopa Maria Tromp. Mina ta bin di un famia grandi di 10 ruman. Mina a bay Lagere School y Huishoudschool na Noord. Mina a traha diferente caminda y semper a realsa trabounan boluntario. E la traha na Maria Con-



vent y ora cu e convent a sera, e zustersnan a wak pa e haya trabou na: Imelda Hof. Mina a y ta aporta ariba nivel boluntario na Asistencia Social, na volleyball, como Leidster pa AMG pa hopi aña. Durante cu Mina tabata miembro di AMG (Antiliaanse Meisje Gilde) e la bira leidster y tabata guia e muchanan den un forma masha sublime mes. Ora mester ta Streng, tabata actua. Mina tabata tuma parti na e grupo di Padvinderij Arubaanse Padvinster Gilde APG. Aki tambe Mina tabata leidster. Mina ta un miembro di koor pa basta aña y ainda ta canta.

Ultimo añanan Mina ta hopi activo pa Pro Juventud Savannah 60 plus di Sabana Liber cu e aña aki ta cumpli 3 aña di existencia. Desde su comienso Mina ta yuda boluntariamente den e comision cu ta

ofrece y organisa e actividad. Actualmente 35 persona ariba 60 aña ta participa na e actividadnan cu ta tur di tres diahuebs di luna. Y e comision organisador ta conta cu 6 boluntario. Mina semper ta presente na tur reunion di comision cu ta ariba diamars anochi. Diarason merdia comision ta prepara e lugar. Mina semper ta e prome presente pa haci su tarea. Diahuebs mainta, Mina ta esun cu ta habri e lugar pa 7'or di mainta. Mina hopi biaha ta brinda tur hende, esta 42 persona, coffie cu Mina mes a prepara na cas.

Tambe Mina semper ta trece regalitonan pa tur 42 persona cu ela logra haya como donacion. Mina durante e programa ta yuda cu canto, clausura di e programa, den cushina y partimento di coy come y bebe. Mina, pa PJS 60+ ta hopi aprecia, stima y respeta. Pa loko ta trata Asis-

tencia Social te di dia di awe Mina ta yuda te ainda mediante misa Santa Anna. Mina ta un persona y un ruman cu semper ta cla pa yuda y a demostra cu su trabounan boluntario pa misa, deporte y ariba tereno social di ta un persona cu di curason a y ta aporta na desaroyo di nos dushi distrito di Noord y cu awe e merece di ricibi Premio Meneer Ovito Tromp 2019.

Directiva di CBN ta felicita Mina y ta gradicie di curason pa tur e trabounan boluntario cu e la haci pa nos distrito y tur loko ainda e lo ehecuta.

Por ultimo Directiva di CBN kier a gradicie e comision independiente cu ta aconseha Directiva di CBN encuanto e persona cu mester ricibi Premio Meneer Ovito Tromp, kendenan ta Glenda Tromp-Croes, Lupita Gil y Rene Ridderstaat.